

四庫全書

子部

欽定四庫全書

子部

唐開元占經卷九十二
四

詳校官中書臣李采

靈臺郎臣倪廷梅覆勘

總校官編修臣王燕緒

校對官中書臣王慶長

膳錄監生臣張濤

欽定四庫全書

唐開元占經卷九十一

唐

瞿曇悉達撰

風占

候風法

凡候風必於高平暢達之地立五丈竿以雞羽八兩為葆屬竿上候風吹羽葆平直則占亦可竿首作槃作三足鳥於槃上兩足連上而外立一足係下而內轉風來

則鳥轉迴首向之鳥口銜花花旋則占之羽必用雞取其屬巽而能知時羽重八兩以相八風竿長五丈以法五音鳥者日中之精巢居知風鳥為其首也今按古書云立三丈五尺竿以雞羽五兩係其端羽平則占然則長短輕重惟其適宜不在過泥但須出眾中不被隱蔽有風即動直而不激便可占候羽毛必須五兩以上八兩以下蓋羽重則難舉輕則易平時常占候必須用鳥行軍權設取使用羽作葆之法取雞羽中破之取其毛

多處以細繩緊縛內中夾之長三四尺許屬竿上其觸鹿扶搖四轉五復之風各以形狀占之

風名狀

爾雅曰風而雨土曰霾陰而風曰曠日出而風為暴迴風為飄焚輪謂之頽扶搖謂之焱

李淳風曰按占風之家多云發石折木揚沙走石等語若每占中俱着此語其文至繁今輒以一家例之

古云發屋折木揚沙走石今謂之怒風多為不吉之

象一日之內三轉移方古云四轉五復今謂之亂風亂風者狂亂不定之象無雲晴爽忽起大風不經刻而止絕絕復忽起古云暴風卒起乍有乍無今謂之暴風暴風主有卒暴事鳴條擢樹蕭蕭有聲今謂之飄風善惡依經旨迅風觸塵蓬勃古云觸塵蓬勃今謂之勃風迴旋羊角古云扶搖羊角今謂之回風回風者旋風也回風卒起而圜轉扶搖有如羊角向上轉輪有自上而下者有自下而上者或

平條長或磨地而起總謂之回風亦專有占 古云
清涼溫和塵埃不起今謂之和風 古云暗冥昏濁
寒尅者今謂之霾曠

凡風和暢清悅溫涼適時埃塵不起人情恬淡是謂祥
風 天色晦暝雲氣昏濁風聲寒慘埃濛蓬勃是謂
災風 風勢紛雜交亂乍起乍止深藏莫測其聲聒耳
是謂小人魅惑風 風勢暴起南北不定離合氛埃
是謂上下不寧風 風勢冥冥白日陰慘黃霧四合

是謂政化未明風 風勢熾熾南北雜亂高下蓬勃
是謂大兵將至風 風勢凜烈人懷戰慄是謂刑罰
慘刻風 風聲啾啾慘切令人悲慙為大喪風 風
聲歛歛如火奔馳乍起乍息為旱火風 連風冥晦
四日五日人皆悲傷為大水殺人風

凡吉祥之風日色清明風勢和緩從歲月日時德上來
或乘王相而來去地稍高不揚塵沙人心喜悅是謂祥
風人君德令下施之應

凡凶災之風日色白濁天氣昏寒風聲叫怒飛沙捲塵
乘刑殺而至當詳五音定八方觀其起止占之 今略
諸家寒尅白濁為例諸稱寒尅白濁今謂之災氣 諸
稱清明溫和謂之和風 諸稱大風寒冥冥日無光沉
沒霧氣今云昏氣

諸例

黃帝占曰凡風之動皆不安之象也若在山川海濱空
穴之間風所出處皆不可占之以為常式若在宮宅城

營之內戰陣之所風勢異常揚沙走石日光昏濁則必占之

凡人君理順四時則春無淒風夏無苦雨先王之治以天下為家兆民為子風起異常用意察之若紛錯交橫離合氛埃相注此風之應必在人主

李淳風曰巽為風風占災異最驗凡候風須築高二尺四尺於上設竿令其四達無隱則遠近皆知期尅不爽矣

凡鳴條以上怒風起止皆詳其五音與歲月日時刑德合衝墓殺五刑生克王相囚死以言吉凶仍以六情推之萬不失一

凡年月日時四殺五墓風從上來白濁昏寒皆為凶風其日三刑最急坐不及起有賊來暴至若行即防伏兵平時無兵防人謀害

凡年月日時刑殺五墓風起日色白濁日氣昏寒興兵動衆逢之急整武備

凡兩軍相當以分主客以日辰所得納音為客以時下
十二時辰與風所來方為主若日辰納音能克時辰及
方為客勝時下支神及風來方能克納音則客敗主人
勝尋常家居亦以此分內外

凡惡風黑風三刑衝破墓殺風當日有大雨及三日內
有大雨其災皆散一曰宮日風當日雨徵風三日雨羽
風五日雨商風七日雨角風九日雨但依日數得雨皆

解

凡風自衝來為殃為喪為火為兵為大人死以占何國
若當時有大雨即不占

凡風滾雨及風後降雨皆雨氣也不占

凡風從太歲上來鳴條擺樹而天色清爽日光明盛着
體清涼溫和者祥風也天子有德令法不私大臣畏慎
國昌民安之象若風勢蓬勃揚塵蔽天着人寒慘日白
無光兼刑帶殺則為國有暴令 月建為大臣 日為
令長 時來為民

凡風濕熱逼人著地走石吹沙鳴條落葉為囚風以日辰占何國飢荒人不安

風勢和緩不揚塵土氣色清溫日光皎潔以日辰占何國歲美人安

凡風起歲月日時德上鳴條落葉及宮日宮時天門乾上發風皆吉風 五音之日風起歲月日時刑上黑色勃勃然經刻冥冥不見人形是謂妖風宮日為君以下四日為大臣死其分下不熟民災以日占國

干德

甲丙戌庚壬為陽陽德自處 甲德在甲 丙德在丙

戌德在戌 壬德在壬此謂自處

乙丁巳辛癸為陰陰德在陽 乙德在庚 丁德在壬

巳德在甲 辛德在丙 癸德在戌此謂在陽取合

為德也

支德

歲月日時在巳德在子 在丑德在午 在寅德在未

在卯德在甲 在辰德在酉 在巳德在戌 在午

德在亥 在未德在子 在申德在丑 在酉德在寅

在戌德在卯 在亥德在辰以次順行前五辰是也

月干德

寅午戌月德在丙 亥卯未月德在甲 申子辰月德

在寅 巳酉丑月德在庚

三合

申子辰 亥卯未 寅午戌 巳酉丑

六合

寅亥 子丑 卯戌 辰酉 巳申 午未

德干合

甲巳 乙庚 丙辛 丁壬 戊癸

歲月日時殺

寅午戌殺在丑 巳酉丑殺在辰 申子辰殺在未
亥卯未殺在戌

吟呻殺

四孟月在酉 四仲月在巳 四季月在丑

歲月日時刑

子刑卯卯為刑下子為刑上 丑刑戌戌為刑下未為刑上 寅刑巳巳為刑下申為刑上 卯刑子子為刑下卯為刑上 辰刑辰 巳刑申申為刑下寅為刑上 午刑午 未刑丑丑為刑下戌為刑上 申刑寅寅為刑下巳為刑上 酉刑酉 戌刑未未為刑下丑為刑上 亥刑亥

凡刑下來者禍淺刑上來者災深自刑者兼刑上刑下其災尤深謂之三刑者刑上刑下自刑也

五墓

亥卯未木墓在未 寅午戌火墓在戌 申子辰水墓在亥 巳酉丑金墓在丑 土墓在辰

干刑

甲刑戊 乙刑巳 丙刑庚 丁刑辛 戊刑壬 己刑癸 庚刑甲 辛刑乙 壬刑丙 癸刑丁

衝破

十二支衝子衝午午衝子 丑衝未未衝丑 寅衝申
申衝寅 卯衝酉酉衝卯 辰衝戌戌衝辰 巳衝亥
亥衝巳

五音六屬法

五音 一言宮 三言徵 五言羽 七言商 九言
角 六屬 庚屬震 辛屬巽 戊屬坎 巳屬離
丙屬艮 丁屬兌 子午屬庚 丑未屬辛 寅申屬

戊 卯酉屬巳 辰戌屬丙 巳亥屬丁

乾主甲子壬午 甲為陽日之始壬為陽日之終子為陽辰之始午為陽辰之終乾初在子則四在午乾主陽內子外午內為始外為終也

坤主乙未癸丑 乙為陰日之始癸為陰日之終丑為陰辰之始未為陰辰之終坤為初在未四在丑坤主陰故內主未外主丑

震主庚子庚午 震為長男乾初九主甲對於庚故震

主庚以父授子故主子午與父同也

巽主辛丑辛未 巽為長女坤初主乙乙與辛對故巽
主辛以母授女故主丑未與母同也

坎主戊寅戊甲 坎主中男故主中干中辰

離主巳卯巳酉 離為中女亦主中干中辰

艮主丙辰丙戌 艮為少男乾上主壬對丙故主丙辰

丙戌是第五配

兌主丁巳丁亥 兌為少女坤上主癸對丁故主丁巳

丁亥是第六配

以地十二辰合十干以十干所屬者命之以其言數納其音以主一日日辰相配共得一音此納音之法也

納音

甲子壬申甲午庚辰壬寅庚戌為陽商 乙丑癸酉辛亥乙未辛巳癸卯為陰商 丙寅戊子甲辰甲戌丙申戊午為陽徵 丁卯巳丑巳巳乙亥丁酉巳未為陰徵 戊辰庚寅壬午壬子戊戌庚辰為陽角 巳巳辛卯

癸未癸丑巳亥辛酉為陰角 庚午丙戌戊申戊寅庚
子丙辰為陽宮 辛未丁亥巳酉巳卯辛丑丁巳為陰
宮 甲申壬辰丙午甲寅丙子壬戌為陽羽 乙酉癸
巳丁未丁丑乙卯癸亥為陰羽凡言宮商角徵羽日皆
依此

地十二辰五音法

子主陽宮土主帝王 丑為陽徵火主旱主火主宮
寺主口舌 寅為陽徵火主旱主火主烽燧 卯為陽

羽水主雨霖主水主霧 辰為陽商金主大將軍主吏
士 巳為陽角木主疾病主憂患 午為陽宮土主后
妃 未為陰徵火主庶人主土功主蜚虫主詔誥主書
檄主旱 申為陰徵火主郵驛尉候主旱火 酉為陰
羽水霜雪主雷電主沉陰主電 戌為陰商金主小將
主兵刃 亥為陰角木主死喪哭泣
李先生曰自午至巳皆為陰律所生故為陽自午至亥
皆為陽律所生故為陰

五音相動風占

宮日風從子午宮來為宮動宮主人君出行急風暴起
急出有急令慢風慢出有喜令以干占知遠近 宮日
風從陽宮來山陵崩壞人君出行地動早有土工風從
陰宮來地震裂若后出行又為旱又曰陽宮之日風從
子午宮來君出行陰宮之日風從子午宮來后出行
宮日風從子午宮來時加子午為重宮君欲行大臣走
又為風雨不調

宮日風從丑未寅申徵來為宮動徵有火燭有土功實
物出有兵

時加徵為重徵有義兵行有土功有詔令謂之義風
宮日風從卯酉來為宮動羽且有大雨不則大臣出走若
復為旱宮君羽臣君怒臣走宮土羽水土盛水哀水哀
則火起故復為旱也

時加羽為重羽即有雨五穀成

宮日風從辰戌商來為宮動商有兵行且有客兵來

時加辰戌為重商有兵殃

宮日風從巳亥角來為宮動角有兵戰人主憂客兵傷
有喪從陽商來邊兵戰有大喪宮為土為君角為木土
動木不勝故君凶木主哭泣故主喪
時加巳亥為重角君不昌有大喪

宮日大風從乾來有暴雨湧水若風不揚塵氣色和暢
日光明盛不寒慘者國有善令 艮來山陵崩壞人君
出行水湧地裂 巽來蝗蟲生害五穀 坤來有土功

走獸為害巳上時加宮則占

徵日風從陽宮來土功起大旱火災頓起宮寺 風從

陰宮來太子有疾

時加徵為重徵有土功火災起

徵日風從丑寅陽徵來有火災君有恐走獸為人害宮

寺多焚從王相來歲太旱又多火災 風從未申陰徵

來人君憂走獸為火災一曰六畜多死 時加丑寅未

申為重徵國四門閉為火事

徵日風從陽商來有急兵人主出以兵自守期七日若
七十日從陰商來有急兵戰一曰風從陽商來輔臣強
大臣死民有殃以日占國

徵日風從陽羽來四鄰有事實物出陰盛於陽且有雷
電霜雹諸侯大臣多失多火四夷有兵從陰羽來寶
物出多震雷四夷有事

徵日風從陽角來有兵邊有急金克木木子火反克金
故有兵亦為有畏從陰角來邊有驚火一曰邊兵大

起春有喪

羽日風從陽宮來人持財物聚君有吏令邊兵起土功
興將受命有集會有寒雪電 風從陰宮來暴寒傷物
有水有土功兵集

羽日風從陽宮來國有兵有急令臣有憂關梁塞道路
不通 從陰徵來邊兵憂

羽日風從羽來有白衣聚有大喪大寒雪電期五日若
五十日且有大雨雨從南方來國有憂人多病雨從北

方來賊聚水中且有雪電陽羽日應陰羽夜應

羽日風從商來有兵圍城不戰邊有急關梁不通大雨客兵不利金水子母和故不戰羽為角除害象臣為君討賊故動必大雨不出戰故也

羽日風從角來邊有兵圍城城破一曰兵不解 時加巳亥為重角有圍城有大喪

商日風從陽宮來戒太子忌怒人臣有急兵宮土商金母憂其子故為太子亦為人主有疾 從陰宮來庶子

有憂有急變兵起北方

商日風從徵來國邑受令兵行將在外兵還不戰臣受
兵令而行徵為號令商為兵商受徵尅故兵退一曰小
旱時加徵為重徵有火有大旱

商日風從羽來大雨水歲大荒國憂亂有兵起東方羽
水從金生故有大兵大水之事

商日風從陽商來有白衣聚眾且有大水關梁不通大
將出忌外兵邑有小寇人主憂國門四閉兵在西方

從陰商來國有大殃粟貴國有兵風怒期七日七十日
有急令兵大起商為金二金並行故有大喪一曰商日
風從商來大臣死

商日風從陽角上來有猝兵有急令 從陰角上來有
喪土功作

角日風從陽宮上來兵從中起君憂國門四閉 從陰
宮來有大喪貴人多疾病有土功宮為君角主喪死故
有大喪

角日風從徵上來大臣災亦防火虫生粟貴一日吏檢人財有兵倉粟寶物出

角日風從羽上來有大雨土功興邊有兵卿大夫多口舌疾病亦為夷人相奪

角日風從商來有急兵一日臣不忠

角日風從陽角來邊兵起人主憂有賊至戰不勝多死從陰角來有兵有大喪一日遠喪至時加角有喪有邊兵戰盜賊起粟貴民飢野多死人角主死喪重角尤

甚也

唐開元占經卷九十一

欽定四庫全書

唐開元占經卷九十二

唐 瞿曇悉達 撰

雨占

雨者陰陽和而天地氣交之所為也太清之世十日一
雨雨不破塊京房曰太平之時一歲三十六雨是為休
徵時若之應凡雨三日以上為霖久雨謂霖

雜占

天無雲而雨謂之天泣其占為國易政若出軍逢之其軍必不還河圖曰主急恚怒則無雲而雨抱朴子曰無雲而雨是謂雨血將軍當揚兵講武以應之雨大軍中尤甚者將軍敗死京房曰人君進無德樹為功則無雲而雨

正月

一日有風雨三月穀貴一曰正月一日風雨其年大惡微風小雨年小惡風悲鳴疾作灾起又曰正月一日風

雨米貴蚕傷風雨從四方來兵起 正月一日無風而
雨歲中下田麥成禾黍小貴 正月上旬雨卯
穀貴一倍中旬雨卯穀貴十倍

正月晦日雨風蕪至糴貴禾惡

二月

一日風雨穀貴禾惡 二日七日八日九日當雨不雨
道中有餓死人九日至十五日當雨不雨兵起十七十
八日當雨不雨蟲冬不蟄十九二十日當雨不雨三月

大旱二十六日至二十八日當雨不雨有逆風從東來
損物

二月晦日風雨多疾病死亡

三月

一日雨井泉空二日雨澤無餘三日雨水旱不時四日
雨變易治五日雨溝瀆滂六日雨壞垣牆七日雨決隄
防八日雨乘船行九日雨難可期 三月一日風雨民
疾病百蟲生其日雷雨有旱 三月一日至三日當雨

不雨秋多大霧道有餓死人七日當雨不雨穀貴九日
至十五日不雨兵在外者罷十八日至二十日當雨不
雨角蟲死天下民有恐二十三日至二十七日當雨不
雨冬蟲不蟄民病 三月辰日雨百蟲生未日雨百蟲
死 三月三日小雨蠶善大雨蚕惡 三月十六日雨
桑柘賤

春

甲寅乙卯日雨入地五寸穀小貴若不貴至夏大貴

春甲申至己丑日雨庚寅至癸巳日雨皆為穀大貴
春甲申雨其年五穀熟春甲巳日俱不雨民不耕

四月

一日風雨米貴麥惡赤地千里 四月二日三日有雨
其年五穀熟 四月四日至七日當雨不雨蟄虫冬出
民自恣不安其處十一日至十四日當雨不雨歲惡十
八日當雨不雨大旱冬溫二十一日當雨不雨兵起東
北千里三十日當雨不雨有大風傷屋 四月四日雨

五穀貴五日六日雨宜旱麥四日至七日風大豆熟四月晦日雨至五月朔大飢其年大水麥惡蝗生

五月

一日風雨米大貴人食草木一曰牛貴 五月四日至七日當雨不雨大旱虫生十一日至十七日當雨不雨西方千里外人疫病二十日當雨不雨草木枯死二十三日當雨不雨乳母多病二十六日當雨不雨大旱風至秋九月多雨二十九日三十日當雨不雨大暑熱

五月上辰日有雨蝗虫發一日虫隨雨下食禾巳日雨

同

五月晦日風雨米貴不則在其衝

六月

一日有風雨米貴 六月三日四日六日當雨不雨角
虫多死四日至二十日當雨不雨牛貴二十日至二十
二日當雨不雨下田水人少食二十三日至二十四日
當雨不雨合凍二十七日當雨不雨下田水人飢 六

月晦日風雨來年春穀貴

夏

甲乙丙丁日俱無雨人不耕 甲申至己丑日雨麥貴

夏甲申日雨米大貴 夏丙寅丁卯日雨秋穀貴一

倍 夏三月內辰日雨百蟲生未日雨蟲死 夏甲子

庚辰辛巳日雨蟲死有雷亦然

七月

一日大風雨米貴人多疾疽者一曰來春穀貴 七月

七日大雨糴倍貴小雨糴大賤 七月二十二日當雨
不雨有大水二十三日二十四日當雨不雨大風害物
二十五日當雨不雨兵起外國 七月晦日風雨穀貴

八月

一日風雨穀貴其日陰雨宜麥布貴麻子大貴占至三
日而止其日晴無雲麥不實 八月一日當雨不雨有
大雷風二日至五日當雨不雨秋大霜民病八日至十
五日當雨不雨多大寒十九日當雨不雨民多妖言二

十一日當雨不雨牛貴二倍二十六日當雨不雨冬多
大雷 八月九日有雨牛貴一倍 八月晦日風雨來
年有水有旱京房曰八月晦日昏而雨繒帛貴人定時
雨貴人賤賤人貴夜半雨米貴嬰兒多損雞鳴雨兵起
一曰夜半雨雨所建寇賊起雞鳴雨兵事急民徙其鄉

九月

一日雨麻子貴十倍二日雨貴五倍一曰九月一日風
雨來年春旱夏水 九月一日當雨不雨霜早降殺物

人棄妻子十二日當雨不雨民多死二十日當雨不雨
天下有恐

九月晦日有風雨有水歲惡

十月

一日有風雨年內旱來年夏多水麻子貴一曰其歲惡
一曰十月一日大雨米大貴小雨小貴 十月二日雨
麻子貴五倍 十月三日當雨不雨兵起西北方七日
至十日當雨不雨江河決水逆流十三日至十五日當

雨不雨多大風寒十九日當雨不雨小兒病二十五日
當雨不雨冬溫無水連年疾病

十月晦日風雨穀貴五倍人多死

十一月

一日風雨人多死 十一月四日當雨不雨大旱八日
至十一日當雨不雨乳母多死十六日當雨不雨民多
死亡貧者富富者貧

十一月晦日風雨春旱穀貴五倍 京房曰十一月雨

水橫流天下飢又曰冬大雨水君死國亡

十二月

一日風雨來年春旱夏多雨穀貴 二日四日至六日
當雨不雨大旱九日至十三日當雨不雨多大霧二十
日當雨不雨有角虫為賊二十七日當雨不雨有大風
雷十二月晦日風雨春旱

冬

壬寅癸卯日雨春穀大貴 甲申至己丑日雨米大貴

庚寅至癸巳日風雨米賤收穀者折閱

干支占雨

春雨甲子六十日旱夏雨甲子四十日旱秋雨甲子四十日澇冬雨甲子二十七日寒雪

春雨甲申五穀熟夏雨甲申五禾大美秋雨甲申六畜死冬雨甲申人多死

春雨乙卯夏糴貴夏雨丁卯秋糴貴秋雨辛卯冬糴貴冬雨癸卯來春糴貴黃帝占曰春不欲雨乙卯夏不

欲雨丁卯秋不欲雨辛卯冬不欲雨癸卯以此四日占
民安否若其日雨則疾疫起

凡四時卯日雨皆主穀價雨一卯斛百文雨二卯斛二
百文雨三卯斛三百雨四卯斛金一斤

正五九月殺在丑二六十月殺在戌三七十一月殺在
未四八十二月殺在辰以此日雨雨所建賊犯之期六
十日

凡壬戌癸亥日雨以乘甲子旬乃止賤人伐貴者京

房占曰諸寅卯日有小雨小急大雨大急 丙午日雨
有圍城 戊午日雨霖三日止其下大戰 乙卯日雨
旱有兵起東方丁卯雨旱有兵起南方巳卯雨旱有兵
起中央辛卯雨旱有兵起西方癸卯雨旱有兵起北方

立春

雨復五穀

立秋

雨害五穀

天鏡占

天雨三日以上不絕陰謀興漢五行志文帝後三年大雨晝夜不絕四十五日以上不絕其後新垣平謀反凡雨作於四時旺相之日草木得之莫不榮茂其死囚休廢之日雖有雨不能生物也

凡泰和之世雷雨必作於巳午陰生之後至夜而止者吉若作於子丑寅卯至丙而晴者為亂為兵亡民失國凡先風後雨為順先雨後風為逆雨止而風雷不止雲霧

不散者國亂人灾

凡先雷後雨其雨必小先雨後雷雨必大也

易候凡占雨以晦朔弦望雲氣四塞者皆雨東風則當
日雨 黑氣如牛羸者有暴雨 黑氣如水牛不出三
日大雨 黑氣如羣羊奔如飛鳥五日必雨 黑雲氣
如浮船雨 蒼黑雲如櫛綿蔽日月五日內雨 雲如

兩人提鼓持桴有暴雨 四望見青白雲名曰天塞之

雲雨之徵也 尚書大傳曰五岳之雲觸石而出皆不崇

朝而雨

京房曰諸六甲日無雲一旬少雨 月離畢之陰則雨
離畢之陽無雨 日傍有赤雲如冠珥不有大風必有
大雨

東方朔占

子日東風卯日雨丑日東風辰日雨寅日東風巳日雨
卯日東風午日雨辰日東風未日雨巳日東風申日雨
午日東風即日雨未日東風申日雨申日東風子日雨

酉日東風丑日雨戌日東風寅日雨亥日東風辰日雨
又曰甲子日雨丙寅止乙丑雨丁卯止丙寅雨即日
止丁卯雨夕止戊辰雨夜半止巳巳雨立止庚午日雨
辛未止辛未日雨戌寅止壬寅日雨即日止癸酉日雨
甲戌止甲戌日雨即時止巳卯日雨立止庚辰日雨即
止辛巳日雨癸未止壬午日雨即日止癸未日雨甲申
止甲申日雨即止乙酉日雨丙戌止丙戌日雨夕止丁
亥日雨即時止戊子日雨庚寅止巳丑日雨壬辰止庚

寅日雨即時止辛卯日雨 止壬辰日雨辛丑止癸巳
日雨夕止甲午日雨即時止乙未日雨丁酉止丙申日
雨夕止丁酉日巳亥止戊戌日辛丑止巳亥日即止庚子
日壬辰止辛丑日壬寅止壬寅日即止癸卯日即時止
甲辰日即止乙巳日丙午止丙午日即止丁未日即時
止戊申日庚戌止巳酉日辛亥止庚戌日即止辛亥日
癸丑止壬子日癸丑止癸丑日即時止甲寅日即止乙
卯日丙辰止丙辰雨丁巳止丁巳雨即時止戊午日即

止巳未日即止庚申日即止辛酉日即時止壬戌日即
止癸亥日即時止 子日雨立止不止寅日止丑日丙
寅日止不止至卯止寅日雨即止不止卯止卯日即止
不止巳止辰日雨已止巳日雨未止不止申止午日雨
立止不止至十日陰未日雨申止不止戌止申日雨夕
止見日不見日久陰酉日雨立止不止久陰戌日雨立
止不止久陰亥日雨立止不止久陰此其大槩也

唐開元占經卷九十二

欽定四庫全書

唐開元占經卷九十三

唐 瞿曇悉達 撰

候星善惡雲氣占

元日祥瑞

漢魏鮮正月朔旦八風占云風南來大旱 西南來小
旱 西來有兵西北來有胡兵胡豆成 北方來為中
歲 東北來為上歲 東來大水 東南來人病歲惡

八風各與其衝對課多勝少疾勝徐自旦至食時為
麥食時至日昃為稷昃至晡時為黍晡時至下晡為菽
下晡至日沒為麻

風從北來宜客南來為主吉西來宜客東來宜主西北來
宜客東南來宜主西南來有謀不成東北來主客俱不
利若風熱冷異常或暴急昏濁又當以八卦暴風占之
京房占正月朔日候八風從乾來有憂兵坎來有大水
艮來人疾疫歲內有虫蝗震來陽氣干歲大早有喪巽

來年內多風傷五穀離來歲旱大熱多火災坤來有疾疫道上多死人兌來有兵事

八節日氣候

立春正月節其日晴明少雲歲熟陰則旱虫傷禾豆風從乾來暴霜殺物穀粹貴 坎來冬大寒胡兵內擾

艮來五穀熟 震來氣洩物不成 巽來多風虫 離

來旱傷物 坤來春寒六月水人多愁土功 兌來早霜

兵起

春分二月中其日東方有青雲歲熟清明物不成 風
從乾來歲多寒金鉄倍貴 坎來豆菽不成民飢病
艮來夏不熟米貴一倍 震來五穀成亦無盜賊 巽
來虫生四月多暴寒 離來五月先水後旱 坤來小
水人多瘧疾 兌來春寒八月國有憂有兵

立夏日南方有赤雲歲豐清明則旱 風從乾來其年凶飢夏霜
麥不刈 坎來多雨水魚行人道 艮來山崩地動人
疫 震來雷不時擊物 巽來其年大熟 離來夏旱

禾焦 坤來萬物夭傷 兌來蝗虫大作

夏至日南方有赤氣則熟晴明則旱 風從乾來寒傷

萬物 坎來寒暑不時夏日多寒 艮來山水暴出

震來八月人多疾 巽來九月風落草木 離來五穀

熟 坤來六月雨水橫流 兌來秋多雨霜

立秋日有白雲及小雨則吉晴明物不成 風從乾來甚寒多

雨 坎來冬多雪多陰寒 艮來秋氣不和 震來秋

多雨電人不和草木再榮 巽來內兵猝起 離來兵

戎不利多旱 坤來五穀熟 兌來兵起將行

秋分日西方有白雲則善清明物不成 風從乾來人

多相掠 坎來多寒 艮來十二月多陰寒 震來人

疫再花不實 巽來十月多風 離來兵動國南七百

里 坤來土功興 兌來五穀大收

立冬日清明小寒人君吉天下喜 風從乾來君令行天下安

坎來冬雪殺走獸 艮來地氣洩人多病 震來人不安居

多寒 巽來冬溫明年夏旱 離來明年五月大疫

坤來水泛溢魚鹽倍多 兌來妖言為幻兵在山澤

冬至日有雲雪寒明年大豐晴明物不成 風從乾來

強國有憂多寒 坎來歲美人安 艮來正月多陰

震來雷不發大雨併 巽來百虫害物 離來冬溫乳

母多死水旱不時人疫 坤來虫傷苗多水 兌來明

年秋雨兵起

立夏巽卦王風從乾來為一逆小凶 立春艮卦王風

從坤來為二逆兵起 立秋坤卦王風從艮來為三逆

穀無實 立冬乾卦王風從巽來為四逆人去其鄉 秋
分兌卦王風從震來為五逆帶刀入市

冬至坎卦王風從離來為六逆人民潰散 夏至離卦
王風從坎來為七逆臣子為亂 春分震卦王風從兌
來為八逆殿上有刺客

七十二候當候不候

正月

是月也東風解凍蟄蟲始振魚陟負冰獺祭魚候雁北草木萌動

孟春行夏令則雨水不時草木早落國時有恐行秋令則其民大疫疾風暴雨總至藜莠蓬蒿並興行冬令則水潦為敗雪霜大執首種不入

二月

桃始華倉庚鳴鷹化為鳩玄鳥至雷乃發聲始電

仲春行秋令則其國大水寒氣摠至寇戎來征行冬令則陽氣不勝麥乃不熟民多相掠行夏令則國乃大旱暖氣早來虫螟為害

三月

桐始華田鼠化為鴽虹始見萍始生鳴鳩拂其羽戴勝
降于桑

季春行冬令則寒氣時發草木皆肅國有大恐行夏令
則民多疾疫時雨不降山陵不收行秋令則天多沉陰
淫雨早降兵革並起

四月

蜚蠊鳴蚯蚓出王瓜生苦菜秀靡草死麥秋至

孟夏行秋令則苦雨數來五穀不滋四鄙入保行冬令則草木早枯後乃大水敗其城郭行春令則蝗蟲為敗暴風來格秀草不實

五月

螳螂生鵙始鳴反舌無聲鹿角解蜩始鳴半夏生

仲夏行冬令則雹凍傷穀道路不通暴兵來至行春令則五穀晚熟百勝時起其國乃飢行秋令則草木零落果實早成民殃於疫

六月

溫風至蟋蟀居壁鷹始擊腐草為螢土潤溽暑大雨時
行

季夏行春令則穀實鮮落國多風欬民乃遷徙行秋令
則丘隰水潦禾稼不熟乃多女災行冬令則風寒不時
鷹隼早鷙四鄙入保

七月

涼風至白露降寒蟬鳴鷹乃祭鳥天地始肅禾乃登

孟秋行冬令則陰氣大勝介虫敗穀戎兵乃來行春令則其國乃旱陽氣復還五穀不實行夏令則其國火災寒熱不節民多瘧疾

八月

鴻鴈來玄鳥歸羣鳥養羞雷始收聲蟄虫坏户水始涸仲秋行春令則秋雨不降草木生榮國乃大恐行夏令則其國乃旱蟄虫不藏五穀復生行冬令則風災數起收雷先行草木早死

九月

鴻鴈來賓雀入大水為蛤菊有黃華豺乃祭獸草木黃落蟄虫咸俯

季秋行夏令則其國大水冬藏殃散民多飢噎行冬令則國多盜賊邊境不寧土地分裂行春令則暖風來至民氣解惰師興不居

十月

水始冰地始凍雉入大水為蜃虹藏不見天氣上升地

氣下降閉塞而成冬

孟冬行春令則凍閉不密地氣上泄民多流亡行夏令則國多暴風方冬不寒蟄虫復出行秋令則霜雪不時小兵時起土地侵削

十一月

鶡鳴不鳴虎始交荔挺出蚯蚓結麀角解水泉動

仲冬行夏令則其國乃旱氛霧冥冥雷乃發聲行秋令則天時雨汁瓜瓠不成國有大兵行春令則蟲螟為敗

水泉咸竭民多疾癘

十二月

雁北鄉鵲始巢雉雞乳征鳥厲疾水澤腹堅

季冬行秋令則白露蚤降介虫為妖四鄰入保行春令則胎夭多傷國多痼疾命之曰逆行夏令則水潦敗國時雪不降冰凍消釋

唐開元占經卷九十三

欽定四庫全書

唐開元占經卷九十四

唐 瞿曇悉達 撰

雲氣雜占

帝王氣

天子氣內赤外黃正四方鬱鬱葱蔥所發之處當有王者若天子欲有遊往其地亦先發此氣遠近數里如法計之吉凶以日辰生尅決期以支干數法

又曰天子氣如城門隱隱在氣霧中又多在晨昏見

又曰天子氣如千石倉在氣霧中

又曰天子氣五色如山鎮 又曰天子氣如高樓在霧

中 又曰氣象青衣人垂手在日西天子氣也 又曰

敵上氣如龍馬雜色鬱鬱衝天者帝王之氣不可擊若

在吾軍必得天助 又曰氣如龜如鳳五色隨王時發

者天子氣也 范增曰吾使人望沛公其氣衝天五色

相摻皆為龍虎此非人臣氣也

洛書曰蒼帝起青雲扶日赤帝起赤雲扶日黃帝起黃雲扶日白帝起白雲扶日黑帝起黑雲扶日

一曰蒼帝氣如人向日拱手而俛首一手在後

赤帝氣如象火光如覆蓐狀立在日下 黃帝氣如馬

在日下 白帝氣如虎在日下 黑帝氣如船在日下

青紫氣自地屬天其地有貴女 凡帝王氣發常以

四時王相時日相生之日相生之日其國大昌

賢人氣

賢人氣視四方常有六雲五色具者其下賢人隱也青雲潤澤蔽日在日西北為舉賢良

將軍氣

將軍之氣如龍如虎在殺氣中兩軍相當若發軍上則其將猛銳欲動也吉凶以日辰決之若無軍在外亦當有暴兵起 城營上氣如火烟或如山林竹木或白色而有赤氣繞之或紫黑如門樓或上黑下赤如旌旗或如張弓弩或如塵埃本大而高首銳而卑或如困倉正

白見日益明或白如粉沸或如夜火光照人此皆猛將
氣也軍上氣黃白而轉澤者將有盛德不可擊 軍上
氣發漸漸如雲變作山形者將有深謀不可擊若在吾
速戰大勝

軍上氣黑下赤氣在前者將精悍不可當 軍上氣如
交虵向人此猛將氣也不可當若在吾軍戰必大勝
赤氣上與天連軍中必有良將

軍上氣青白而高者將勇大戰前白後青而高者將弱

而士勇前大後小將怯不明 軍上氣青而踈散者其
將怯弱可擊

兵氣

勝兵氣上與天連或如火光或如山隄上有林木或如
埃塵粉沸其色黃白或如旌旂無風而颺揮勢指敵或
白氣粉沸如樓緣以赤氣或如人持斧向敵或如蛇舉
頭向敵或如埃塵前卑後高或如牛馬頭低尾昂或如
旌旗如鋒刃向人或有人如牽牛或如乳虎或如足帛

或如覆舟或氣似堤覆前後皆白此皆雄兵猛士之氣不可擊若在我軍上急戰大勝

軍上氣黃白色潤澤重厚者勝

軍上發黃氣將士精勇不可擊若在吾軍可戰

軍營上有赤黃氣上達於天者不可擊 軍上有五色

氣上與天連此天應之軍不可擊 軍上氣上小下大

其軍士日增益不可擊 軍上氣遙望如鬪雞赤白相

隨在雲中得天助不可擊

軍上氣上銳其色黃白圓而澤者其將勇猛士卒能強
戰不可擊 雲如日月而有赤氣繞之似日月暈或有
光者所見之城邑不可攻 雲氣如伏虎居上或如華
蓋或如杵形向外或如赤馬或如山岳皆不可攻敵上
有氣或雲如中天至而及我軍常有此而不變者不可
攻軍上常有氣者難攻有雲狀如鳥飛去者其國戰勝
兩軍相當敵上有氣如飛鳥徘徊或來而高者兵精
難擊 夜視彼軍上有黑氣出上有赤氣臨我軍上彼

強我弱弱能破強小能擊大大戰大勝小戰小勝望
四方有赤氣如烏在黑氣中或如黑人在赤氣中或如
赤杵在烏氣中或如人十十五五有行列或狀如旌旗
在烏氣中有赤雲氣在前者其兵精銳不可當雲氣
三匹帛前橫後大在軍上者戰勝

敗兵氣囚廢枯散如馬肝色或如死灰或如偃魚或如
偃蓋或乍見乍聚乍散如霧始起或如羣羊如羣豬在
氣霧中皆哀亂也軍上氣如死蛇如擊牛如雙蛇垂

頭如蜚鳥四散如決隄垣如壞屋如人無頭如人相指
如驚鹿相逐如兩雞相向或如人頭如揚灰如捲席如
縣衣如匹布亂攘如人相隨或如粉如塵勃勃如烟或
五色襍亂東西南北不定或如羣鳥亂飛或紛紛如轉
蓬或如敗船或如卧人無手足或如覆車襍亂不起者
皆敗軍之氣擊之必克

軍上氣上大下小者士卒日減 軍上十日無氣發者
其軍必敗十日無氣而忽有赤白氣乍出即滅者外聲

欲戰而實欲退散 黑雲氣如壞山墮軍上名曰營頭
之氣其軍必敗散 軍上氣如火光夜照人者軍士散
亂 軍上氣出而半絕者欲敗漸盡者走一絕一敗再
絕再敗三絕三敗在東發白氣者災深 軍上有氣如
雙蛇守日急往擊之大勝勿疑 軍上有赤氣炎降于
天士卒衆亂將死

赤氣如火光從天流下入軍軍亂將死 軍上氣蒼蒼
須臾散擊之必勝若在我軍宜嚴備固守

軍上氣前高後卑者敗 軍上有黑氣如牛形或如馬形從氣霧中漸漸入軍名曰天狗食血其軍敗散 軍上氣蒼黑亂者士卒飢 兩軍相當十里之內三里之外望彼軍上氣高而前後白青散者敗氣也急擊之 雲氣如人頭臨軍上戰大敗流血滿谷

雲如雞如兔臨營上者軍敗走 雲氣蓋道蔽濛晝晦者飯不暇食炊不暇熟宜急去之不然必敗

軍上氣黑而卑如樓狀軍不移必敗 軍上氣先青而

漸變黑者其將欲死 散軍之氣如燔生草之烟前雖
銳而後必退得便擊之勝 黑氣臨營或聚或散如鳥
將宿者必有雲如鳥其出如虫其國戰不勝 敵上有
雲氣如丹蛇者擊之勝有雲氣如尾在氣霧中臨軍上
者中人與外人通 軍行有白氣如猪來臨者軍大驚
宜備之 日暈有氣如死蛇屬暈者將死兩軍相當不
利先舉 日暈旁有赤雲如縣鐘其下將死 日月暈
有背氣所臨者敗

軍上有白虹及曲蜺者敗 白虹及蜺入營者敗 日
暈氣薄惡及後至先去其下軍敗 日暈有四缺在外
軍悉敗散 凡日月暈與氣以先有者為發先去者為
散軍上有日旁虹蜺不可逆之若得其逆宜徙去之
降氣如人十十五五皆低义手或如人义手相向或氣
如黑山以黃為緣者皆降伏之氣也 白氣如鳥趣入
屯營連絡不絕而須臾下者當有他國來降 暴兵氣
白如瓜蔓連結部隊相逐須臾罷而復出或至八九而

來不斷者有急賊猝至宜防之白氣如仙人衣千萬連
結部隊相逐罷而復興如是者當有千里兵來宜備之
黑氣從彼來之我軍者欲襲我也敵人吉宜備不宜
戰敵還從而擊之必得小勝天色蒼茫而有此氣依支
干日數內無風雨則所發之方時則凶時克日則自消
散此氣所發之方當有使告急一人來則氣一條依數
計之若散滿一方則有衆來依日支干數內有風雨則
伏

關

氣如人持刀盾或有雲如坐人赤色所臨城邑
有猝兵至驚怖湏臾去 赤氣如人持節兵來未息

雲如方虹或如赤虹其下有暴兵 雲氣如旌旗其下

兵暴起 雲氣如虎躍如人行色白而悴者暴兵起

雲如人行止而不崩有暴兵 白氣如帶道竟天有暴

兵 候敵氣上有雲下亦有雲者兵必至 白虹所出

必有暴兵流血 赤雲如火所向兵至 雲氣如匹布

着天經丑未者天下多兵赤者尤甚 有雲如胡人列

陳天下兵起 白氣廣五六丈東西竟天天下兵起

有雲如豹四五枚相聚其國兵大起 雲如狗四五以

上相聚兵起 四方清明無雲獨有赤雲赫然者所見

之地兵起 四望無雲獨有黑雲極天名曰天溝天下

兵起雲半天則兵半起三日內有雨則灾解 壬子日

候四方無雲獨有雲如旌旗其下兵起若偏四方則天

下盡有兵

雲氣一道上白下黃或白色如疋布長數丈或上黃下

白如旗狀長二三丈或長氣純赤而委曲一道如布帛
皆謂之蚩尤旗見則兵大起

風雲氣

風雨氣如魚龍行其色蒼潤或黃氣蔽日昏慘或如積
土或如累盆黃黄色潤厚朝東夕西壓日或奄之皆風雨
之氣也 朝視日上有黑雲氣如霧壓日日光旁射其
色慘淡黃白者其日有風雨晚日欲入有之則其夜有
風雨 雲氣如亂穰大風將至視所從來避之雲甚厚

而潤大雨必暴至 四始之日有黑雲氣如陣厚重而
潤者多雨 日始出有暈氣如車蓋在日上者其日雨
日上下有黑雲氣如蛟龍者必有風雨 雲氣如黑
蛇衝日其下有大雨水

月初生色黃者多晴色青多雨色潤白者大雨

蒼雲氣入北斗多大風 黃雲氣蔽北斗明日雨 白
氣掩北斗不過三日雨 青雲氣掩北斗五日內雨

天無雲而白斗上下獨有雲五日內大雨 日入後有

白光如氣自地至天直入北斗所歷星皆失色其夜必
有大風 太白出氣長數丈多風雨所指處兵大起
辰星出氣長一丈大雨水

九土異氣

海旁蜃氣象樓臺 廣野氣成宮闕 自華以南氣上
黑下赤 嵩高三河氣正赤 恒山之北氣青 渤海
之間氣正黑 江淮之間氣皆白 東海氣如簞簦
河水氣如引布 江漢氣勁如杼 濟水氣如黑純

渭水氣如狼白尾 淮南氣如白羊一曰如帛 少室
氣如白兔青尾 恒山氣如黑牛青尾 東夷氣如樹
西夷氣如室屋 南夷氣如閣臺或如舟船幡旗
北夷氣如羣羊如穹廬

韓雲如布 周雲如車輪 秦雲如行人 衛雲如犬
魏雲如鼠 齊雲如絳衣 越雲如龍 蜀雲如囷
宋雲如車 吳雲如日當其地而見者不占



唐開元占經卷九十四

欽定四庫全書

子部

唐開元占經卷一百九十五至

詳校官中書臣李采

靈臺郎臣倪廷梅覆勘

總校官編修臣王燕緒

校對官中書臣王慶長

謄錄監生臣張濤

欽定四庫全書

唐開元占經卷九十五

唐

瞿曇悉達撰

角宿雲氣干犯占

雲氣如刀劍出兩角間有陰謀天子無出殿庭期不出
三十日青氣入角天子有疾出之禍除赤氣入左
角兵起右角國兵驚戰不利赤氣入角而波揚者有
火灾如行者將奔命赤氣從兩角過入亢有過兵

赤氣從北斗直過兩角間迴有過兵 白氣出入兩角
戰不勝 白氣從兩角過入亢者有過客 蒼氣入左
角有兵兵敗 蒼雲氣出右角兵在外者戰有憂 蒼
白雲氣出入兩角兵有大敗 黑雲氣出入兩角用兵
偏將敗有水災 黑氣從兩角過入亢有過兵 黃氣
入兩角間天子有祠祀事 黃白氣潤澤入角王者得
地

亢宿雲氣干犯占

雲氣青色入亢人疫出氐入亢人君有疾 黑雲氣入
亢有水災一曰有使出外言水事荊州占曰人多瘧疾
黑氣出氐入亢君有疾死 赤雲氣入亢廊廟間有
陳兵 赤而揚波大人憂大疫 黃白雲氣入亢有治
事 白雲氣入亢有土功人疾病

氐宿雲氣干犯占

雲氣入氐黃白色有土功 黑色大水 赤有內兵
蒼白色疫疹大行 白色天下疫久不散宮中有女喪

黑氣入氏房間天子遣使於諸侯有口令

房宿雲氣干犯占

雲氣入房赤黃潤澤名寶入出房國寶有出者 黃雲
氣入房外國入貢 黑雲氣出房宮中有憂 黑氣入
房諸侯有使來言口令之事且有大水 赤雲氣入房
宮中內亂大兵起 赤雲狀如人入房后有娠不然姦
事起 赤雲氣如波揚入房宮中火災兵起廟廷人主
杌隉不安 紅雲氣入房諸侯王有死者期三年 蒼

白雲氣入房將相憂 白氣如大道入房委蛇入漢國
有大水兵起宮中人民流亡飢死路旁屍骸不收不過
二年帝王崩婦女傭客不還 雲氣如帶經兩角間入
房關門閉再經之兵起三經之天下不通

心宿雲氣干犯占

雲氣出心青色天子使人於諸侯 赤色有兵將出
赤黃氣出心王就國 黑雲氣入心天子憂入左星庶
子憂入右星太子憂一曰黑氣入心右星庶子受賜祿

白氣入心天子左右臣作亂兵起 白氣入心左星

太子受賜 赤氣入心有立王 赤氣出心南行天子

左右有亡去者 赤雲氣鋒銳正刺心天子憂 蒼白

氣入心中星天子憂 黃氣入心天子有子孫喜入右

星太子喜 黃白雲氣潤澤如匹布正抵心下外國有

來歸者 雲氣狀如彗帚色赤如血入心天子遇賊出

心天子有殺伐若出遠則殺貴殺伐人於千里之外

尾宿雲氣干犯占

青雲氣入尾故臣有來歸者出尾臣有死者 白氣入
尾故臣有謀來歸而受誅者 黑氣入尾故臣有來歸
骸骨者 赤黃氣入尾有使來言兵事 黑氣出尾人
民流亡 青氣出尾臣作亂 赤黃氣出尾君遣使于
諸侯言兵事

箕宿雲氣干犯占

黃白雲氣入箕蠻夷有使來 黃雲氣入箕有獻美女
者變而色黑道死不至色蒼道上為風所覆 蒼白雲

氣入箕其國有災出之災除 黃白雲氣出箕天子使
者出一曰宮中美人有出者 赤雲氣出箕兵出入之
兵入

斗宿雲氣干犯占

蒼白雲氣入南斗多大風 赤雲氣入斗兵起如波揚
大旱多大災 黃白雲氣入斗諸侯來見天子不則有
使者來貢 黑氣入斗宗廟中有大憂 赤氣入南斗
外兵入出斗內兵出 黃白氣出斗天子使人於諸侯

赤氣入北斗還向南斗不出一年其下有流血將死
營空客勝主人

牛宿雲氣干犯占

蒼白雲氣入牛牛多死出之則災消 蒼白雲氣橫貫
牛宿有兵喪除舊布新 黃白雲氣入牛牛蕃息一曰
諸侯有以四足蟲入貢者 黑雲氣入牛天下牛多死
赤雲氣入牛牛馬多以漕輓死者出之則兵出 赤
雲氣如波揚入牛有兵大戰牛馬大損白氣入牛有兵

喪

虹出牽牛之度有崩城期二年

女宿雲氣干犯占

雲氣黃白色入女國有嫁娶事 蒼白雲氣入女天下

女子多疾病出之則災消 赤雲氣入女婦人多產死

者一曰多兵死 白氣入女女子多疾疫 黑氣入女

天下多女子之喪 黃雲氣出入須女天下女子多喜

事

虛宿雲氣干犯占

雲氣入虛蒼白色有哭泣出之禍除 黃雲氣入虛天子以喜起廟祀祠 黃白雲氣入虛亨氣也天子敬祀宗廟 赤雲氣入虛有火災一曰有兵在廟中出虛有兵廟外 白氣入虛有無幣之客來出虛有使出外 黑氣入虛有水災一曰廟圯 雲氣如立虹出虛天下大虛多火災

危宿雲氣干犯占

蒼白雲氣入危天子大造宮室 青氣入危國憂有損
屋 赤雲氣入危有土功蓋屋之事大作 一曰宮中有
兵憂 赤氣出危以火發屋 一曰有火災 黑氣出危
北鄉大水流亡東鄉其國君死百草不實西鄉人主
憂死喪南鄉有疾疫期不出其年遠明年 黑氣入危
自北來大水西來死君東來稻粟不實南來有兵皆不
出一年 白氣出入危其國有兵 黃雲氣出入危皆
為土功興 一曰黃氣出危國有喜 白氣及黑氣入危

者皆有死喪哭泣事 青黑氣出入危皆有水災

室宿雲氣干犯占

黃雲氣入室有土功事 蒼白雲氣入室大人憂喪

黃白雲氣潤澤入室諸侯有使來若出室天子有使出
外皆言宗廟之事 赤氣入室有兵 赤雲氣如大道

來室上下人主不可出宮有逆臣有疾病不出三年其
土大飢有軍在外則有大戰流血暴尸 赤氣如波揚
入室兵入宮有亡國 黑氣入室大人有死喪 青氣

入室其國憂 雜氣入室人多暴死 有氣明潤光澤
如日月之彩出入室中男子之祥 黃氣光明潤澤出
入室國有喜

壁宿雲氣干犯占

蒼白雲氣入壁大人憂死喪出之禍除 赤雲氣入壁
有兵 赤雲氣入壁如波揚兵火並起大臣有燒死者
赤氣從西壁入東壁兵氣也天子手殺其臣 黑氣
入壁有破國亡主一曰有大水 黃雲氣入壁天子裂

土建侯陳卓曰烈士出 青雲氣入壁有兵起 黃白
雲氣入壁外國入貢 一曰天子立廟期一年

奎宿雲氣干犯占

蒼白雲氣出奎有兵入奎天下婦人多災 赤雲氣入
奎有兵入出之兵出一曰有疾病 赤氣入奎有偽使
一曰有無所受命而來者 赤氣出奎有詐出使者
黃雲氣入奎中有貢珠玉珍寶者 一曰天子納后夫人
黃氣出奎璽寶有出者 一曰有出宮人不則后妃有

黜者 赤氣入奎天下婦人多血疾 黑氣入奎有疾
疫三日夜不出大人憂之出則禍除

婁宿雲氣干犯占

青黑雲氣入婁有兵疫出之則禍除 白氣入婁人民
受賜 黃氣入婁貴人受賜 黑氣入婁有水有白衣
之會 黑氣出婁紛紛如轉蓬始至大人食中毒一日
大水且至 赤雲氣如劍鋒入婁宗廟苑牧中兵起
青氣入婁有兵憂

胃宿雲氣干犯占

蒼白雲氣入胃國以喪糴粟 青黑氣出胃兵起 赤
雲氣出胃以兵出粟 黑氣入胃倉粟敗腐 蒼白氣
出胃以喪出粟 黑氣如轉蓬出胃大人食中毒死且
有大水 黃白雲氣明澤入胃大人入國倉庫充實出
之有出粟賑民之事 赤雲氣入胃以兵糴粟

昴宿雲氣干犯占

蒼白雲氣入昴人疾疫多死妖言大起出則禍除 黑

氣入昴北地災 蒼赤雲氣入昴人疾疫多妖言不則
龍見 赤雲氣入昴有軍令白衣將兵一曰天子自將
民聚鼓下 赤氣出昴軍在野處 青黑氣出昴有兵
且有大水 黃白氣潤澤入昴天子白衣會出昴白衣
會罷

昴黑有珥兵息

畢宿雲氣干犯占

蒼白雲氣入畢歲不收出則禍除 赤雲氣入畢兵起

赤氣如波揚大旱有火災 黃白氣入畢其歲美出

畢則授民田 一曰黃氣帶白入畢天子有太子喜兵在外者解 一曰其歲有大人 生 黃白氣出畢有拜將

赤氣出畢將軍兵出 黑氣入畢相亂政將死 白氣

入畢相死出則禍除 赤氣入附耳兵起出之將軍兵

出 蒼白氣入附耳將軍死 黃白氣入附耳天下無

兵安 黃白氣出附耳有拜將 黑氣入附耳將死

觜宿雲氣干犯占

蒼白雲氣入觜天子有葆旅之事出之則禍除 赤雲
氣入觜兵起 赤氣如揚波入觜中兵入國火隨之出
觜則兵隨之出 黃白氣潤澤入觜有神寶入一曰有
負寶玉來獻天子者 白氣入觜民食葆旅 白氣出
觜有葆旅之事於國外 黑氣入觜大人憂邊將戮趙
地有災出之禍除 黃雲氣出觜國兵隨之出入觜國
兵入

參宿雲氣干犯占

蒼白雲氣入參臣為亂 蒼白氣出參伐而環繞天子
自將兵巡邊 蒼白雲氣入伐大將憂有斬刈之事

蒼白氣出伐以白衣行斬刈事 蒼氣入參邊境有憂
赤雲氣入參內兵起將軍為亂誅 赤雲氣如波揚

入參邊城倉庫焚 赤氣出參中央邊有大兵 赤氣
入伐有斬刈將軍憂 黑氣入參大水將軍死氣銳如
鋒大人當之 黑氣出參有兵有水災將軍憂 黑氣

出伐以水伐國 白氣入參天下用兵一曰天子有陰

病 黃白氣入參大將受賜 黃氣出伐將軍戰勝

井宿雲氣干犯占

青雲氣出井大如井口上拂參而行入河中大水沒城
郭期二十日遠三十日 蒼白氣出井有水令入井民
大疫 黑氣入井民疾病多死喪天下大水道無行車
黃白雲氣入井有客來言水澤事 赤雲氣入井大
水不則疾疫亦為旱 蒼白雲氣入井有喪女主惡之
白氣入井大雨水 赤氣入井有兵一日水賊起

赤氣入井天子以水行兵 黃氣出井天子以澤泉之
利養民 恒以正月朔夜候東井中或上下有雲氣潤
澤則其歲多潦

鬼宿雲氣干犯占

黑氣入鬼大人皇后皆有憂 白氣入鬼人疾病 赤
雲氣入鬼大早有火災 黃氣入鬼有土功

柳宿雲氣干犯占

赤雲氣入柳有火災出柳大旱 黃雲氣入柳期五十

日有赦一曰黃氣入柳天子造宮室土木大興黃氣出
有赦 黑氣入柳天子宫廟木腐敗 黑氣如鋒刃刺
柳三夜不散大人憂 白氣出柳國有憂兵出 白氣
入柳天子造宮室 蒼白氣入柳有憂 黃白氣出柳
天子出美木作室入柳得美木

星宿雲氣干犯占

蒼白雲氣入七星大人憂 蒼白雲氣出七星天子有
急使其氣回曲而不正有亡臣 赤雲氣入七星中

兵氣也若有客來必有兵隨之 赤雲氣如波揚入七
星中火氣也宮中有火災四曲五曲后妃惡之 赤氣
出七星天子使出亦有兵隨之出 黃氣彷彿入七星
外有貢獻 黃氣出七星天子有賜於諸侯氣見而大
風隨之者有赦 黃白氣潤澤入七星遠人來貢 黑
氣入七星賢人多死出之禍除 白氣入七星國有死
喪 雲如蜚鳥啄七星大人有憂

張宿雲氣干犯占

蒼白雲氣入張庭中觴客有憂變出之禍除 赤雲氣
出入張天子用兵賜物 白氣入張大客有憂 黃氣
潤澤入張天子因喜賜客 黃白氣出張天子命使賜
諸侯 赤黃氣入張有憂出張天子用兵 黑氣入張
徘徊而散其分有水災 黑氣入張而轉繞之或如刀
劍刺之天子防客 赤雲氣如揚波入張天子宫中大
哭

翼宿雲氣干犯占

赤雲氣入翼有暴客入國境 赤氣出翼其國兵出隨
氣所之 蒼白氣入翼太常之官憂之 黃氣潤澤入
翼諸侯來貢物 黃氣出翼天子遣使於諸侯 黃白
氣入翼外國入貢 一曰白氣若黑氣入翼正抵其星三
夜不去宗廟有憂大人恐兵大起

軫宿雲氣干犯占

蒼白雲氣入軫王者不可行幸宮觀出之其禍除 蒼
雲圍軫亡國之戒 黃白雲氣潤澤入軫諸侯入貢以

車為幣出軫天子以車賜諸侯 赤雲氣入軫兵從中起 赤雲氣如波揚入軫車庫火災兵且起有大喪 赤氣出軫將出兵行 白氣入軫有大喪 黑氣入軫大人憂 黑氣如鼠入軫中天子有墜車墮馬落床之厄 黑氣四散入軫及回繞之天下大水車不用

唐開元占經卷九十五